

A KASSAI SZABÓK 1461. ÉVBELI CZÉHSZABÁLYZATA.

Item es ist czu merken, nach dem und ain yezliche Czeche bey dieser Stadt Casscha begerende ist, sie bey Irer gerechtikait czu behalden, damit sie sich desterpas aufgehalden, auch an irer narung gebessern, darczu uebel und gut bey der Stadt mitleidende czu nehmen, muege und so denn zwisschen der erbarn lewten alz Gewandtschneidern und den Maistern der Schneider czehe allhie wonhaftig manicherlay aufstoesse bis daher sint gewest, also daz ain tail dem andern in seyner gerechtikait hat gegriffen. Suliche aufstosse hinczulegen und daz ain ydes tail hinfuer bey seyner gerechtikait muege gepleiben, haben wir Richter und Rathmann der obgenannten Stadt mit reiffen Rate betrachtende den erbaren Maistern der egemelten Schneiderczeche nach Irer fleissigen anlangung dise hernach geschriben Artickel czu besserung Ires hantwerks gütiglich mitgegeben und verlichen, daz sy auch bey neben andern hantwerkn dester bequemer am auskommen gehaben muegen.

Czum ersten, daz sy von aynen yezlichen ynwoner diser Stadt gewandt muegen kewfen nach Irer notdurft und was czu Irem hantwerk gehoert, daz sy des muegen gebrauchen czu verschneiden und czu verarbeiten nach Irem nutz allhie bey der Stadt oder auf dem lande.

Item ap (= ob) yndert ayner under Ine wer, der es vermoechte gewandt czu kewfen von aynen Gaste ain tuch oder fuef oder mehr, daz Er dasselb gewandt frey soll sein auf dem lande czu verfuere und czuverthuen, wie Er kann oder mag.

Item so denn nach loeblicher gewonhait und freytumb dieser Stadt ayn yezlicher Inwoner von aynem Gaste gewandt mag kewfen czu seyner leibes notdurft, also und den egenannten maistern der Schneider czehe mitgegeben ist, daz sy auch frey mueger sein gewandt czu kewfen von aynem Gaste was In czu Irem, auch Irer weiber und kinder leibe not ist, es sey Schoengewandt oder anderley darnach es ain yderman vormag. Mit denselben Artikeln haben wir obgenannten Richter und Rathmanne denn dy egemelten Maister der Schneiderczeche gütiglich begnadet und Sy dabey stetiglich czu behalden mit craft dieser Czedel bestetiget, des czu mehr sicherhait haben wir das also auch in unser Stadtpuch lassen czaichen. Geschen am nagstn Freitag vor dem Suntag Oculi in der vasten (= fasten). Nach Christs gepurt etc. in den LXI Jahre.

Commissio dominorum in consilio.

(Kassa város Stadtbuchjából.)

Közli *Kemény Lajos*.